

# ЛҮИМА СЭРИПОС



www.khanty-yasang.ru

Общественно-политическая газета

E-mail: luima@ugracom.ru

Основана 11 февраля 1989 года

23 мая  
2014 года  
№10  
(1076)

*Ты этпос 15 хоталэ ма янытыл  
щёмьят янытлан хоталыг олыс*



А. Алдаева посолум хури

Ты  
номерт  
ловиньтэн:

Кол ёвтнэ  
урыл  
ляххал

2

Сакв махманув  
пормасаныл  
ощнэ кол

7

Сав тал  
лёккарыг  
рүпитам хум

10

Кит  
районыгныл  
кётым  
ляххалыг

12

Вёсынтүрныл  
тётым  
потыр

16

Ты хотал 1994 тал пәсныл янытлаңкв патвес, ООН (Организация Объединённых Наций) мат рүпитан махум тан ты тамле хотал вәруңкв лавсыт. Касың тал та хоталт сав ныврамың колтаглыт янытлавет. Ман маньши махманув халт тамле щёмья ос сав олы.

Ты хурит Хулумсунт павылт оlnэ Петровыг нэг-хумыг нывраманэн эт пöслым олэг, ойкатэ руш, экватэ маньши, Оля Номина. Ман тананылн сав емас латың тетэв – пустагыл вос олэгыт, нывраманэн емас хотпаг вос яныгмёгыт, Тöрум эт, Отыр эт!

## ЛЯХХАЛЫТ

# Кол ёвтнэ урыл ляххал

**Ты талныл округувт «Накопительная ипотека» намба йильпи вәрмалъ рӯпитаңкве օвылтахтас. Евгений Чепель, Ипотечный агентства колт кұщай, օс Владимир Вешняков, Ханты-Мансийский банкыт рӯпитан хум, ты тәла урыл потыртасыг.**

Программа хумус рӯпитаңкве паты օс махумн хумус тах нёты ты урыл Евгений Чепель латың лавыс. Кол ат օщнэ хотпат օвлёт Ипотечный агентстват օчередин хасхатнэныл магыс эрнэ нэпаканыл тотыяныл. օс ты юи-палт ты махум Ханты-Мансийский банкыт օс агентства ёт соглашение-нэпак хансэгыт. Тувыл касың этпос хот сotyра 250 солкօви тув пинункве օвылтахтэгыт. Сав олн ке сэлэгыт,

тыгыл савнув олн тув кетэгыт. Кол ёвтнэ хотпат тох 1-6 талыт сыс олн акван-атуңкве вәрмэгыт. Ипотечный агентстван нэпаканэ тотыяныл, օс ты банкыт олн акван-атуңкве ке патэгыт, касың этпос округ бюджетныл акв щемья банкын 12 сotyра 500 солкօвил кетаве. Акв щемья округ бюджетныл 450 сotyра солкօвил миңкве вәрмаве.

Владимир Вешняков лавыс: «Элумхолас акван-атнэ оланэтыл

օс округ бюджетныл кетнэ нётмилыл (ты 900 сotyра солкօви) кол ёвтуңкве ат вәрми. Тыи магыс тән мән палтув ипотека-олн виңкве вәрмэгыт օс 15-30 талыт сыс ювле օйтхатуңкве».

Ты тал хұрум этпос сыс Ипотечный агентстван 150 элумхолас тәнки нэпаканыл тотсаныл, тән халанылт 91 щемья тув хасвес. Тән олн тох акван-атуңкве ань օвылтахтасыт. Евгений Чепель лавыс, мәнлат щемьят, соссан махум, балокыт օлнэ хотпат օс кол ат օщнэ щемьят пуссын тув хасхатуңкве вәрмэгыт. Ты программа 2020 тал мус рӯпитаңкве паты. Кит сotyра арыгкем щемья кол ёвтнэныл

магыс олныл ты щирыл тах нётавет.

Махум օс китыглахтасыт, ты олныт акван-атуңкве мот банкыт рօви ман ати. Евгений Чепель օс ювле лавыс:

«Мән ань мот банкыт ёт потыртахтэв тах, ань ты программа хосыт Ханты-Мансийский банк рӯпитаңкве кәсашас. Тыи магыс ань туп ты банкыт олн атуңкве рօви».

օс акв вәрмалъ урыл кұщай хум лавыс, ань йильпи саккон щирыл атхойплов тал арыгкем округувт օлнэ щемьят туп тән бюджет олныл нётавет. Мот маныл ёхтум օс округувт мощща тал օлнэ махум ты программан ат хансавет.

**Людмила ТЕТКИНА**

# Яныгпала хотпанув нётавет

**Яңк натнэ этпост Победа хотал кастыл Мири нётмил вәрнэ департамент кұщай Мария Краско ляххал тотнэ махум акван-атыгласанэ. Ань ветеран хотпат օс хотьют хоттлын накт рӯпитас, тән манхурип нётмилыл варавет, тав потыртас.**

Округувт ань хот сotyра ветеран хотпа օлы. Тән халанылт 441 элумхолас - агмыңмосың хотпа օс хоттлум махум; 5 сotyра 288 - яныг хотн порат савсыр тәрвитың рупата вәрум хотпат; 80 - Ленинград ўс блокадат օлум махум; 191 - тұрманколт фашистытн саватым хотпат. Ты коньпал тот порсум хотпат тән экваныл օс яныг хотн порат яныгмам няврамыт ань օс пуссын нётавет. Ты махум 9 май хотал кастыл օс олныл օйтвэсыт. Кұщай нэ лавыс: «Мән

мир пусмалтан департамент ёт акван-потыртахтым рӯпитэв. Ты хосыт ветеран хотпат пусмалтахтуңкве вәтихал кетыглыанўв. Яныгпала хотпанув савнув тал вос օлсыт, мән яныг рупата вәрэв». Хоттлум махум янытлан магыс округ бюджетныл 26 миллион солкօви тастыглавес. Касың хотпа премия-олныл майвес.

օс акв вәрмалъ урыл потыр օлыс. Ань ты хотал мус 30 ветеран хотпа йильпи кол иң ат օныщэгыт. Ты ветеранытныл китхуй-



Округ Дума депутат Эдуард Исаков Ханты-Мансийск ўст օлнэ ветеран-хотпат ёт хотнхатыглас, тән ётаныл щай аис, потрамас.

плов элумхолас магыс ань федеральный бюджетныл олн майвес. Ты тал ойгпан мус тән колыл ёвтавет тах. Та сыс, иң нёлоловхуйплов хотпа кол тал օлы. Тал холнэ мус пуссын колыл вос минувет.

Тувыл օс ань округувт 79 ветераныт рұт тал хулытсыт. Ты хотпат магыс округувт янас колыт ўнттувэсыт. Тән тот օлэгыт, лёккарытн акваг уральтавет.

**Николай МЕРОВ**

## ЛЯХХАЛЫТ

## Туи порат сака рёгың паты

**А**лександр Тиртока округувт МЧС Яныг кўшай хумыг олы. Яныг вит ёхты ман ати ос туй вёрың ма нәйн тэве ман ати, тав ёмашакв вәгтэ.

Александр Александрович лавме щирыл, округувт Нижневартовский, Нефтеюганский, Кондинский, Октябрьский, Белоярский, Ханты-Мансийский ос Хальёс районьт 26 павлытт яныг вит вәруңке вёрма. Тот акв сётыра 894 кол витын амараңке вёрмавет. Та колытт 9 сётыра 194 элумхолас олы. Яныг вит ке вәри, ты махум пусын мот ман вәнтлүңке нётавет. Ты кастыл округ янытыл олнэ колыт щёпитавёсыт, руш латңыл лававет – «пункты временного разме-

щения».

Александр Александрович лавме щирыл, ты тал яңк нәтнэ этпос ойпанэтэ ос лупта этпос овылтаханэтэ порат яныг вит ёхтуңке вёрма. Ань МЧСт рупитан махум ты кастыл мұсхалыг щёпитахтасыт, округувт олнэ махум ул вос пилэгыт.

Кўшай хум вөр ўрған вәрмалъ урыл таи потыртас. Ты тал туй порат сака рёгың паты, туй магсыл округувт сака сав вөр нәйн тах тэве. Вөр Белоярский ос Хальёс районьгт яныгыш тот ты нәйн



ёсаве. Кондинский, Ханты-Мансийский ос Сургутский районьт тарыг яныгман вөр нөх-пеламлаңке вёрмаве. Ань МЧСт 12 сётыра 500 нәй харыгтан хөтпа рупиты. Тан акв сётыра 300 савсыр техника оныщёгыт, нәй лап-харыгтаңке

вёрмагыт. Нәй сав лөль ул вос вәри, МЧСт рупитан хөтпат округувт олнэ мир ёт рупитаңке ань овылтахтасыт. Махум потыртавет, вөрн яласанэныл аращаныл ёмашакв лап вос харыгтыяныл ос хохса тот мори ул вос пахвтэгыт.

**Людмила ТАСМАНОВА**

## Махум мот мирьт вәңкв ханищтавет



**Ю**горский университет колт ханищтахтын маңылат махум магыс научно-практический конференция олыс. Касың порат ты ханищтап ханты ос маңыщи студентьт ёт рупитан маңыщи эква Диана Васильевна Герасимова вәрыглы.

«Этножурналистика» нампa кафедра ханищтахтын маңылат махум магсыл ты колт конференция вәрим олыс. Диана Васильевна тәнаньлн ань лавыс: «Мән округувт савсыр нәпакыт тәра ос телевизор хосыт програмат вәравет. Ам това порат телевизор хосыт хоты махум урыл суссылтаве, щарат торгамтэгум. Төванакт тох олыглы, ханты урыл кос хансэгыт маңыщи хурит тув вәравет. Хумус эри, тәра ат паттыяныл, ляххалт аквантэлыгтым номтаныл мирн тох та тотыяныл.

Сав студент Россия

янытыл савсыр маңыл тыт ханищтахты. Таи магсыл ты мән журналистыг ханищтахтын студентанув ёт соссаң мирув олупса ханищтаңкв овылтасүв. Ты тал «этножурналистика» нампa курс титыт талэ ты төвлы. Акв тал сыс тит щёс тамле семинар вәрыглэв. Няврамытын савсыр мир олупсаныл ханищтаңкв пұмшиг олы. Ханищтахтынэныл сыс матыр ат торгамтэгыт те, тән танти ам палтум ёхталэгыт, титыглахтэгыт. Маныр тәнаньлн эри, ёмшакв хұлтэгум».

**Александр ВЬЮТКИН**



# Няврамыт пёс олупса вос вагыт

**С**оссаң няврамыт ёт рӯпитан хотпат смәгыс Ханты-Мансийскат ханищтап вәрыглавес. Тамле вәрмалъ региональный образование институтт рӯпитан махум щёпиталсыт. Ос руцц щирыл тав «Новые подходы к реализации проекта «Погружение в этническую среду» намаим олыс.

Губернатор ваңын хумн нётмил вәрнэ нэ Людмила Алфёрова овлэтакван-атхатыглам махум ёт пащалахтас ос тән вәрнэ рӯпатаныл янытласанэ. Тав юи-пәлэт Ирина Лисютина, округ янытыл соссаң

махум образования-ныл ос мәнәлат хотпат тэланыл ёт рӯпитан нэ, ты проект щёпитан ос вәрнэ рӯпатаныл урыл потыртас.

Тувыл Сургутский район Угут ос Русскинская павлыг школагт

соссаң махум няврамыт ёт хумус рӯпитэгыт, манхурип пұмаш тэлат тән вәрыгласыт, ты овылтыт потыртасыт.

Кит хотал сыс ёхталам махум ұст оlnэ музейтын тотыглавёсыт. Тот «Торум маа» музейт ос Г.С. Райшев тав мастерской-колэт, соссаң махум олупсаныл ос пёс наканыл суссылтавёсыт. Тувыл «Лылың союм» этноцентрын ялсыт, тот мәнәщи ос ханты куль-

тура, ләтың ханищтан няврамыт ёт потыртасыт. Ты махум тәнки халанылт акван-нётхатым элалъ рӯпитаңкве лавхатсыт.

Нән матыр тэлат пұмшалаңкве ос тарапаттуңкве таңхегын ке, ищхыпың ут хосыт [ugutschool.ru](http://ugutschool.ru) манос [russhooli.ru](http://russhooli.ru) лопсыт савсыр потырт, ляххалыт ос хурит хонтуңкве вермегын.

Тамара МЕРОВА

## Тув кастыл щёпитахтын вәрмалъ

**Т**ув палыт няврамыт ұщлахтын вәрмалъныл палт кұщаиг оlnэ махум магыс округ мирколт сапрәни вәрыглавес. Тот щар яныг кұщаиг Алексей Андреевич Путин олыс, тав округ губернатор ваңын хотпаг рӯпиты.

Овлэт Елена Владимировна Немчинова потыртас. Тав мирн нётнэ департаментыт няврамыт ёт рӯпитан тэла тармыл кұшай нэг олы. Тав лавыс: «Ты тув няврамыт ұщлахтынәныл магсыл округ бюджетныл 1 млрд. 720 млн. 600 сөтыра солкөви тастувес. Ты тув няврамыт ұщлахтынәныл магыс 524 мāt рӯпитаңкв патэгыт. Ос 4 сөтыра 500 няврам ұщлахтуңкв тот вәрми. Ты тәл тōва ұщлахтын мāt савнув няврам тән-ти палтыланыл виңкв матрыг ат кәсашёгыт.

Тот рӯпитан махум ты урыл тох лавёгыт: «Мән сав няврам таи магсыл виңкв ат кәсашёв, сака сав нәпак щёпитаңкв эри. Тувыл тәл палыт та

нәпаканув пирмай-таңкв ат вәрмавет. Мощчанув няврам те ёхты, тэлав моляхнув мины.

Ты тәл соссаң махум пёс йис олупсаныл суссылтан щирыл 7 млн. солкөви майвес. Тамле мāt ұсың ос яныг няврамытын ұщлахтуңкв сака пұмаш. Савың-пәлэ тув ялнәныл юи-пәлт аквта мән ялуңкв мот щёс ос вөвхатэгыт. Ты кастыл мән няврамыт магсыл савнув ұщлахтын мә щёпитаңкв таңхёв».

Та юи-пәлт мир пусмалтан Департамент колт ваңын кұщаиг рӯпитан нэ Тамара Давыдовна Овечкина вәрнэ рӯпатаныл урыл махумн потыртас: «Ань мән йильпи яныг нәпак щёпитэв, мощер-



тын ты астлылұв. Ты нәпакт та урыл хұлтэв, хот, хумус ос маныр мұсхалыг щёпитаңкв эри. Ты тәл округув янытыл акв сөтыра хұрумсат ляпатем савсыр лёккар рӯпитаңкв паты. Онтоловхойплов сөтыра ағмың-мосың ос сакватахтам няврам пусмалтахтын ос ұщлахтын мән тотнэ щирыл олэгыт. Тувыл «клещевой энцефалит» ағмощнэ тёрыңхомлахытн няврамыт ул вос тōвмавет, ұщлахтын мāt вөрың мәнаныл

тұяг тәрпил рассалтавет».

Тән потыртамен юи-пәлт лёңхыт тармыл оlnэ полиция ос най харыгтан щирыл рӯпитан тит хумыг тув кастыл щёпитахтын урыл потыртасыг.

Няврамыт ұщлахтын мән минмыгтанәныл элы-пәлт кұщаит ос тах акван-атуңкв лаввёсыт. Хотьют матыр вәруңкв ат те алыми, штрафыл пинаве.

Александр ВЬЮТКИН

## КҮЩАИТ РҮПАТАНЫЛ

## ТЭНУТ МАНКИ ӨЛНЭ МӘВТ ВАРЁВ



Ань округувт АПК (агропромышленный комплекс) элалъ тотнэ магыс сав рүпата варава, күщаиг тот Евгений Платонов рүпиты. 2013 талт тан хумус рүпитасыт, тавты урыл потыртас.

Юи-өвыл талыт ты вәрмалъ акваг савмалтаңкве патвес. Тыи магыс сав олн таставе. Тәнки рүпата вәрнэ хөтпат савнун үйхул онышукве патсыт. Махум мисыт, пүршит ос щиккурёкыт янмалтэгыт. Ань округувт өлнэ лапкатт савыңпалэ манки вәрүм тәнүтанув тыналавет.

Молты тал налыман нупыл нёлолов савит пёрма пүсвес. Тот рүпитан хөтпат нёлолов сөтыра арыгтем тонна нёвыль, хұрумхуйплов арыг тонна щаквит тыналан магыс тастысыт. Щар савнун щаквит ос нёвыль Ханты-Мансийский, Нефтеюганский, Сургутский ос Нижневартовский районьт рүпитан пёрмат мыгыт.

Округувт ань сав нё-щишкурёк янмалтаве, тан сав муңи тотэгыт. Сэмыл охсар янмалтаңкве патвес. Ты үит касың талныл акваг савмёгыт. Салыт ос савмалтавет. Ань ты накт округувт ват нупыл хұрум сөтыра арыгтем сәлы ёмтыс.

Ань тал котиль этпос мус Саранпавыл совхозт аквхуйплов сөтыра атсат арыгкем сәлы ань ўрава. Белоярский районт ОАО «Касум павыл оленеводческий

компаният» сәт сөтыра сәлы ылы. Ханты-Мансийский район Кышик павыл «Вар» намп общинат хұрумсәткем сәлы янмалтаве.

Касым павыл «Осетные» намп соссаң махум общинат китсат арыг сәлы онышаве. Кышик павыл «Ай-Тупос» намп общинат ос хөтхуйплов сәлы ылы. Ты общинат соссаң хөтпат вёраим, хұл алышлым ос вёрт савсыр пил, ләхыс атым рүпитэгыт.

Молты тал сыс сәлың махум пуссын аквёт кит сөтыра атпан савит тонна нёвыль тыналан магыс вәрсыт. Тыгыл элалъ округувт совхоз сәлыт акваг савмалтаңкве тах патавет. Тәнки сәлыяныл янмалтан хөтпа ос сав ылы. Округувт пуссын сәлыт акван-ловиньтаңкве ке, налыман нупыл нёлолов сөтыра савит сәлы пуңк аня ёмты. Ты коньпал ос мөт савсыр эрнэ рүпата варава. Ты сака ёмас вәрмалъ, тәнүт манки өлнэ мәвт вәрёв.

Николай МЕРОВ

## КҮЩАИТ МИР ЁТ САВНУВ ВОС РҮПИТЭГЫТ

**О**круг Общественный палатат рүпитан күщаит акван-атхатыгласыт ос тәнки вәрнэ тәланыл ывылтыт потыртасыт. Любовь Чистова, Общественный палатат күщаиг өлнэ нё, ләвыс, ань тән щиранылт савсыр департаментыт манос службат акв тамле 30 общественный советыт вәрвёсыт ос тув 265 элумхёлас рүпитаңкве пёриявёсыт.

Ань ты щёпитан вәрмалит пәсыл кит тәлыг ты ёмтыс, туп төват торыңыщ аты рүпитасыт. Това мат сапрәни вәрнэ магыс махум ывыл щёс акван-атыглавёсыт, тот совет тармыл күщай хөтпа пёриясыт ос тувыл рүпатаныл та оигпас.

Тот рүпитан махум тәрвитың тәлат ёмшакв вәрнэ ос тәнанылн нётнэ магыс вәрвёсыт кос. Советыт тәрвит вәрмалит ёмшакв тәрапаттукве вос нётэгыт ос ётыл сәкконьт мұсхалыг хаснёныл магыс мак ләтың хұлтукве вос вёрмысыт. Тамле тәлат совет тармыл рүпитан хөтпат акваг уральтым вос оныцияныл. Тувыл тән Правительство күщаитн элалъ ләтың вос тотэгыт. Ты күщаит савсыр вәрмалит тәрапаттым порат сәкконьт ос торгамтым щёпитаңкве патыяныл. Губернатор вәңыг хум Андрей Филатов ты ывылтыт ләвыс, советын пёриян хөтпат округ махумн нётнэ магыс вёщкатыг вос рүпитэгыт. Махум хұлтыглан ләтңанылн ос вос хұнтамлэгыт. Та щиралакван-нётхатым тән пуссын рүпатаныл ёмшакв ос макыг вәрияныл.

Общественный ос

внешний связь департаментыт күщаиг өлнэ хум Илья Верховский потыртас: «Советыт пуңкотнэ хөтпат ос тәнанылн нётмил вәрнэ хөтпат тәнки сәкконьт, экономика ләххалыт пуссын ёмшаквег ос вос вәганьыл. Тәлат урылхөт-әтинотмыңыг потыртаңкве восхәссыт. Тувыл вос вәгыт, ты рүпатаныл урылтан мөт күщаитн уральтаңкве ос китыглаңкве вёрмавет. Тамле уральтан накыт кастыл общественный советыт рүпитаңкве кәсәщегыт ке, вос элалъ рүпитым хұльтэгыт. Тувыл махум тәнанылн агтукв патэгыт, тәнки тәланыл магыс тән палтаныл ләлыт сымыңыщ ювыт. Ос ёмас тәлат вәрнэныл магыс янытлаңкве патавет».

Ирина Астапенко, гражданский служба ос кадровый политика тәлат вәңын күщай

нё, савсыр хаништапыт ывылтыт потыртас. Күщаиг воратан хөтпат махум ёт номтыңыщ ос сымыңыщ рүпитан магыс хаништаңкве эрэгыт. Таимәгыс тән сыресыр касылыл ос хаништапыл щёпитавет, таит юи-пәлт экзаме-ныл варавет.

ЖКХат ос энергетика рүпитан колыт общественный совет мөлты тәлт вәрсыт. Тот хөт хөтпат акван-атхатыглэгыт ос маньыр тәрвит тәлат ёмшаквег вәрнэ щирыл аквёт номсахтэгыт. Ты ывылтыт ләтың Виктор Нанак ләвыс, ты колт күщаиг ылы. Тән Общественный советаныл тәл сыс 9 сапрәни вәрыглас ос сәкконьт щёпитан порат эрнэ торыг тән ләтың вәрсыт.

Тамара  
МЕРОВА

## ХАНИЩТАП

# Мāньлат мāхум ханищтан тēла

**О**круг мирколт соссаң мир ёт рӯпитан Ассамблея колт мāнти щāнь лātҗанув элаль тотнэ щирыл сапрāни олыс. Тот олум кӯщаянуv ос мāхманув халт щар янгыг Наталья Западнава ос Татьяна Гоголева олсыг.

Пуссын аквѣт на-  
лыман нупыл атах-  
тем хōтпа тув атхаты-  
глас. Тот щāнь лātҗанув  
элаль тотнэ урыл, тэн  
ул вос ёрувлaхтэг ос  
мāньлат мāхум ханищ-  
тан вāрмaль урыл по-  
трув олыс.

Овлѣт Татьяна Степа-  
новна мāньщи ос ханты  
нѣврамыт урыл такви  
щѣпита́м доклад-по-  
тре ловиньтастэ. Тав  
юи-пāлѣт округ яны-  
тыл ханищтап щирыл  
рӯпитан Департамент

вāнын кӯщаиг олнэ нѣ  
Валерия Кугаевская по-  
тыртас.

Валерия Алексан-  
дровна округ яны-  
тыл элаль ханищтах-  
тын соссаң мāньлат  
мāхум урыл докладэ  
олыс: «Округувт он-  
толовхойплов ханты  
ос мāньщи нѣврам  
рӯпатаныл пѣриян щи-  
рыл ханищтахтэгыт.  
Пуссын аквѣт 919  
соссаң мāхум халт  
226 нѣврам высший  
образование щирыл



С. С. Динисламова ос А. И. Сайнахова

рӯпитаңкв таңхѣгыт.  
Мōтаныт ос мōт савсыр  
рӯпата щирыл ха-  
нищтавет. Сāвыңпāлэ  
соссаң мāньлат хōтпат  
Ханты-Мансийск ўст  
ханищтахтэгыт. Мōлты  
йильпи сākкон хас-  
вес. Ань онтолов класс  
āстлын нѣврам атте-  
статт хансым оценка-  
нэ щирыл колледжит  
ханищтахтуңкв вѣрми.

Тавѣн ЕГЭ экзамен тот  
ат эрмыглы. Ты тāl  
таи мāгсыл сāv нѣврам  
онтолов класс юи-пāлт  
пѣриян рӯпата щирыл  
элаль ханищтахтуңкв  
номсѣгыт. Тыи мāгыс  
āгитытн-пыгытн кол-  
леджин эрнэ нѣпа-  
каныл тāнтинāнылн  
атуңкв эрѣгыт».

**Александр ВЪЮТКИН**

## ЕГЭ урыл потыртасыт

**Л**илия Максимова ханищтап ос мāньлат  
мāхум тēлат округ департаментыт  
кӯщай вāныг нѣг рӯпиты. Мōлалнуv тав ЕГЭ  
вāрмалит школат хумус минѣгыт, та овылтыт  
мирн потыртас.

Ты тāl округ янытыл  
11 сōтыра арыгкем āгит-  
пыгыт школа āстланэныл  
щирыл ловиньтахтэгыт.  
Тāнаныл уральтан ос  
экзаменыт минэ мāгыс  
округт 124 ханищтан ко-  
лыт сыресыр ищхипың  
уытл вāрвѣсыт.

Тувыл 974 экзамен  
пирмайтан колнаканыл  
пуссын кит видеокаме-  
ра оныщѣгыт. Нѣврамыт  
тот пōх мāныл нѣматыр  
ул вос ловиньтэгыт,  
тāн элы-пāлныл ос  
сыспāлныл уральтаңкве  
патавет. Ты коныпал  
тōва щāнь-āщит нѣв-  
рамыт нас ураль-  
тāлыглаңкве вōвавет.

Экзамен минэ порат  
āгит-пыгыт колнакн

паспортаныл щирыл  
тāртавет, ос ёт туп геле-  
вый хаснэйив, линейка,  
транспортир вос выгыт.  
Тōва экзаменыт кальку-  
ляторыт эрмыглѣгыт ке,  
нѣврамыт тах лāвавет.  
Тувыл āгмың нѣврамыт  
тѣрпияныл ёт тотуңкве  
вѣрмияныл.

Лилия Владимировна  
щāнитн-āщитн лāвыс:  
«Нāнан ос нѣвраманын  
тамле экзамен порат  
пилуңкве щар ат эри.  
Тот нѣврамыт школат  
аквхуйплов тāl сыс  
ханищтан номтаныл  
уральтавет. Тāн щар  
нѣматыр ловиньтаттāl,  
ханищтаттāl хунь  
олѣгыт. Урокыт порат  
тāн савсыр контроль-

ный рӯпатат хансѣгыт  
ос оценкал пинавет.  
Тāн туп сытмыл  
нѣпакныл манос мōт  
ищхипың утныл ул  
вос хассыт. Комис-  
сиян хōнтавет ке,  
экзаменыл сысы нѣв-  
лавет ос ты тāl воссыг  
тув ат тāртавет,  
мōтыт тālн хульту-  
тавет. Та щирыл ты  
тāлт нѣмхотталь элаль  
ханищтахтуңкве ат  
вивет».

Школа āстлам кāсын  
нѣврамн ЕГЭ щирыл  
рущ лāтың ос матема-  
тика хансуңкве эри. Рос-  
обрудзор мāt рӯпи-  
тан мāхум таи хултѣгыт,  
рущ лāтың экзамен ём-  
щакв минэ мāгыс 36  
балл ловиньтахты, ма-  
тематика мāгыс 24 балл.  
Хōтпа тыгыл мощца  
балл оныщи ке, тав эк-  
заменэ лѣолиг ловинь-  
таве ос мōтыт щѣс

сдавайтаңкве лāваве.

Ты экзаменыг ко-  
ныпал ЕГЭ щирыл  
нѣврамыт мōт урокыт  
тāнки пѣриѣгыт. Ты тāl  
сāвыңпāлэ āгирищит-  
пыгрищит общество-  
знание экзаменын ми-  
нѣгыт, мōтаныт физи-  
кан. Нѣврамыт элаль  
хоталь ханищтахтуңкве  
минѣгыт, тув эрмыглан  
урок та пѣриѣгыт. Ту-  
выл та оценканыл щи-  
рыл хотты университетн  
манос институтн вивет  
ке, экзаменыл тот ат вā-  
равет. Ты кастыл тай  
ЕГЭ хансуңкве ёмасыг  
олы. Сартын май уни-  
верситетт манос инсти-  
тутт элаль ханищтахтын  
мāгыс экзамен ос янас  
хассыт. Ань туп нѣпакыт  
акван-атуңкве эри ос  
акв-кит мāн кѣтуңкве  
рōви, тувыл ювле-лāвнэ  
лāтың уруңкве эри.

**Тамара МЕРОВА**

# Сакв махманув пормасаныл оцнэ кол

**Х**альёс район Саранпавыл шко-лат музей олы. Тув шалтсамум порат Виктория Валерьевна Хозяинова ёт хонтхатыгласум, тав ань та музейт рупиты, ты коньпал няврамыт ханищты. Виктория Валерьевна маньши нэ, аги опарищ наме Качанова. Мён тав ётэ потрамасмён, нан ань элал потрумён ловиньтэлын:

– Школант оlnэ музе-ин манах тал рупиты?

– Овлёт тав пёс шко-лат олыс, та школа найн нох-ёсвес. Тувыл 2002 талт музей ийльпииг вёрыслув, школат кол-накыл майвесув. Матё-мас тамле музей колнак оныщев, сакати ты хосыт ханищтахтан няврамыт танти культураныл урыл мощ ваңкве патэгыт.

Маньши мир порма-сыт акван-атуңкве сав хотпа нётыс – няврам ханищтан махум, няврамыт, яныгхотпат. Пуссынакван-нётхатым ман яныг тэла вёрсув. Ам омам Елена Ефимова Качанова ты му-зейт сав тал рупитас, кущаиг олыс. Мань павлытт савсыр пор-масыт атыс – Сукырьят, Ясунтыт, Саранпавылт, Хорыпавылт.

Музейот ань 218 пор-мас оныщев – маснут, лагыл маснут, аны-саныт, савсыр хусап-совыт, хул алышлан ос вёраян пормасыт, та ма-ныр пуссын олы. Ты тал

мань таквс ётпост райо-нув янытыл оlnэ шко-лат халт конкурс вёраве. Хоты школат шар мак ёмас музей олы, тав та нох-паты. Ман остаңхев тот касуңкве, эрың хот-ты места выгүв.

– Няврамыт музейн ёхталэгыт?

– Атхунь ёхталэгыт, пумшалахтэгыт, тыт экс-курсиял вёрыглыанув. Това пормасыт уро-кын тотыглыанув, няврамытн сунсыгла-вет, касың пормас урыл потрамев. Маньши латың урок ханищ-тан нэ Светлана Саве-льева Мерова музейт матыр-ати ватихал вуй-лы. Няврамытн латың ханищтанётэ порат ма-тыр суссылты, тыхал латың ханищтэгыт.

Ты тал пасыл шко-лавт «Совет бабушек» хонтхатыглап вёрсув. Тованахт яныгхотпанув ёхталэгыт, няврамыт ёт матыр мащтырлэгыт, потрамегыт.

– Наң хот самын пат-сын?



Анжела Филиппова, В.В. Хозяинова ос  
Галия Артеева

– Ам тыт, Саран-павылт, самын патсум, школа асласум. Элаль Санкт-Петербург уст А.И.Герцен наппа уни-верситетт история ос культурология учителя ханищтахтасум. Ань ты школат ам сосаң мир ос ма янытыл оlnэ ми-рыт культураныл урок ханищтэгум.

Мён ойкамёнтыл хурум няврам оны-щимён. Яныг пыгмён Женя Санкт-Петербург уст университет аслас, ань Тюмень уст рупиты. Паша пыгмён ос Санкт-Петербург уст ханищ-тахты, Настямён школат атыт классыт ханищ-тахты.

Мён Виктория Вале-рьевна ёт музей колнакн

шалтсасмён. Ам маньши махманув вёрыглам пормасыт сунсыгла-сум, пумшаласанум, пёслысанум. Тав това пормасыт урыл мощ потыртас. Акв хурыг касаласум, китыглахтэгум, маныр совыл юнтым олы, на-сати, сыг совыл юнтыма. Та ляпат мот хурыг хуи, тав ос сорт совыл юнтвес. Тув колас манос сыртэп пинуңкве рёви. Хургыг Елена Ефимова Ка-чанова юнтыгламаге. Рактыл вёрим пүтсов люли, ты ос Ясунтыт олум эква Анна Дми-триевна Немдазина тав вёрыгламе. Сукырьят олум ойка Иван Дани-лович Сайнахов ульпа тарыл савсыр хусап-со-выт вёрыглам, тованэ ос музейн тотвёсыт, тот ты оныщавет.

Виктория Валерьев-на тамле ёмас эрнэ тэла вёри – маньши махманув вёрыглам пормасыт мирн суссыл-ты, потырты. Ты ятил маньши нётёв щёмьятэ ёт пустагыл вос олы, Наянэн-Отыранэн вос ургалаве!

Светлана  
РОМБАНДЕЕВА



9 МАЙ – ПОБЕДА ХӨТАЛ КАСТЫЛ

# Нөх-патум хөтал янытлавес

**Я**ңк нәтнэ этпос онтоловит хөталт Ханты-Мансийск үс кант Победа хөтал кастыл яныг парад щөпитәлвес. Яныг хөнт оиг-пам пәсныл ань 69 тәлыг төвлыс. Ялпың хөтал олум порат сака вөтыс ос ащирмаң олыс. Ос ты ати, үс канын сәв мир ёхталас. Ветеран хөтпат рүтаныл ёт ёхталасыт. Мәхманув хумус мүйлысыт, нән ты урыл элалъ ловиньтән.

Ялпың хөтал лов щөст овылтахтас. Мир элы-палт өвләт округ губернатор Наталья Комарова потыртас. Тав лавыс: «Ты хөтал мир мәгыс щәгтнэ хөтал. Кәсың щөмьят мәхум ёмщакв мүйлэгыт. Мән элалъ ёмщакв өлнэв мәгыс мәхманув ты хөнтлысыт.

Ты ялпың хөталн атахатыгланэв порат мән опанув, ащөйканув ос рүт мәхманув хоты мāt хөнтлысыт, акваг номылматыгләлэв.

Ам хөнтлын мәныл кәтыглам пицма сәв ловиньтасум. Владимир Манин Самарова пәвылныл олыс. Тав



тох хансыс: «Ам вәтихал пөслым хури сунсылум, тот эквам, агим ос ам, мән пуссын акваёт лөлёв. Ты хурим акваг ётөныцилум, аквагупмат мән акваёт фашистыт ёт хөнтлэв. Ты хури аңум сака үргалытэ, таимәгыс иң пустәгыл өлэгум».

Мир пуссын вәганыл, мән сәлтатанув мә янытәт фашистытныл хот-сыстамтасаныл. Россият өлнэ ветераныт нөх-патнэ мәгыс мак тән сәв ёр пинсыт. Таимәгыс ты ялпың хөталт ам хөнтлам хөтпат пуссын сымыңыщ янытлыанум.

Победа хөталыл нәнаның мәхумавет!»

Тав юи-паләт ос Ханты-Мансийск үс кұщай Василий Филипенко потыртас. Тав лавыс: «Ты ялпың хөталт ветеранув янытлан кастыл щәгтым мүйлэв. Мән хөнтлум хөтпанув сака эруптыанүв. Ты посың хөтал кастыл тән танкинәныл сәлиттәл хөнтлысыт. Мәввуянтан мәгыс сәв хөтпа порс-лавес. Ты хөтпат пуссын номиянүв. Ань мир ёмщакв өлнэ мәгыс тән сәв ёр пинсыт, мәввуянтасаныл. Ам ос Ханты-





Мансийск үст өлнэ мир, пуссын ветераныт Победа хөталыл янытлыанүв. Яныг пумащипа нанан лавёв. Рутанын ёмщакв вос үргалавён, пуштагыл элаль өлэн».

Тувыл ос Виктор Яковлевич Башмаков, Ханты-Мансийск үст

өлнэ ветеран хөтпа, мир нупыл потыртас. Тав 1924 талт Ханты-Мансийский район Реполово павылт самын патыс. Хөнтлын нак ёмтыс, тав тонт нёлохуйплов талэ иң ат төвлыс. Таимагыс рупитаңкве кётвес. Колхозт тракторыл рупи-

тым яласас. Тонт касың пыг моляхнувөг фронтын минуңкве таңхыс.

Ётылнув таланэ төвлысыт, тара хөнтлын мән тотвес. Та порат мән салтатанув фашистыт ёт такыщ хөнтлуңкве патсыт, акваг ювле нявлуңкве патсаныл. Война элыпалт Виктор Яковлевич павыл школат нёлолов класс асталас. Таимагыс хөнт оигпам элы-палт тав ханищтахтын мән кетуңкве ёмталавес, ос тав ат касащас, элаль хөнтлуңкве хультыс. Берлин үс мус моща верыста хультсас кос, ос ойка тув мус тох аты ёхталас. Акв хотты хөнтлын мат сакватыма хөнтвес ос пүльницан тотвес. Вөртыпал катэ снарядын такыщ сакватавес, лёккарытн хот-вуйвес. Ань тав та пасныл туп акв катыл олы.

Хөнтлын нак оигпас, Виктор Яковлевич юв ёхтыс. Ёрыг өлнэ магыс тав касың хөтал такмалтахтуңкве патыс. Товтыл касыс ос нас хайтыс. Каснэ вармалитн акваг вовиньта-лаве, сав щёс нөхпатыглас. Тав Ханты-Мансийск үс «Почётный гражданин» намыл

маивес. Тыт өлнэ мирн тав ёмашакв ваве ос янытлаве. Война юипалттав савтал суд-колт люль нак варнэ хөтпат сутытым рупитас. Ты тал мән таквс этпос 17 хөталт тав 90 талэ төвлы. Яныгпала хөтпакве пуштагыл элаль вос олы. Мән тавёныл сака янытлахтэв.

Потрыт астысыт, махум акв кум астал люльсыт, порсум мир номылматыгласаныл. Тувыл ос полицият, МЧСт, мәнхлат курсантыт ос военный хөтпат акв юи-палт ряд щирыл нётнэг ёмсыт. Ёс кан хосыт кит хөнтлын машинаг минасыг. Та юи-палт пуссын махум ахвтасың парт тармыл хорамың лүптат пинсыт.

Ты ялпың хөталт ёс кант мир хөнтлын писалит сунсыглаңкве вермысыт. Тувыл махум хөнтлын нак порат эргыглам эргыт эргысыт, касащан махум каша пут арталасыт ос исум щай айсыт. Тот рөг магыс яңк вина ломт мощ пинумталвес.

Ятил, ветеран-хөтпат, Най-Отыранын вос үргалавён. Сав тал пуштагыл элаль өлэн

**Николай МЕРОВ**



# Лёккарыг рүпитам ыйка



А.А. Головин

**А**ндрей Алексеевич Головин 1936 талт Саранпавылт самын патыс. Тав саран хум, ань Хальўст ылы. Оматэ Фёкла Фёдоровна «Сталин» нампа колхозт рүпитас, аще Алексей Степанович воруи совыт пирмайтас. Алексей Степанович 1941 талт хонтлын мән вуйвес, 1943 талт июль этпост Орловский областыт порслувес. Щаняныл хул алышлым сака пöльтахтас, аквта тал октябрь этпост атимыг ёмтыс.



Е. Адинамайхури

Ты хурит Татьяна агитэ ос агитэ аги Валерия Хулумсунт ос Няхшамволь павыл махум ёт пöслымат.



Андрей Устинья увшитэнтыл тэнттетэн хулытсыг. Тöнт тав хөт талэ төвлыс, Устинья мощ яныгнувөг ылыс. Пыг 1944 талт сат талэ төвлыс, школан та минас. Өвлэт Саранпавыл школатхаништахтас, тувыл Кульпаст, Лөпмуст. Школа Кульпаст асластэ.

Та тарвитың пора урыл Андрей Алексеевич тох потыртас: «Мөн увшимёнтыл ментте-мён хулытсумён, нём-хотьют мёнамён ат нётыс. Тав рүпитаңкв патыс, Нёрн салыт ловиньтаңкв тетвес. Ам юн амттем хулытсум. Мисув рүтанувн тара алвес, нёвле лакква-маивес. Найванум хола-сыт, күрум палтыглаңкв эри. Ам конторан найв виңкв миначум, тоттара та пуввёсум, ань манрыг ат титыглахтасум, виңкв рөви ман ати. Мөтыт хөтал найвыл тотвёсум.

Төнт Кульпас школат Алексей Васильевич Голошубин рүпитас, тав ам увшимтув рүпитаңкв вöвыстэ. 1945 талт тув та миначмён. Ам школат хаништахтасум, увшим рүпитас. Школа

ахламум юи-палт ам Ханты-Мансийск үсн фельдшерско-акушерский школан (ФАШ) хаништахтуңкв миначум. Акв тал ат хаништахтасум, ос олн тал өлуңкве тарвитың, рүпитаңкв та патсум. Төнт Мария Ивановна Воскресенская күщаиг тот ылыс, тав аномн элалэ хаништахтуңкв ювле вöвыстэ.

Та талытт амнистия щирыл сака сав хөтпатурманколнылюв тартвёсыт. Үст төнт ты сав ыыл вәрвес, махум пилым олсыт. Колыт нөх ул вос пёламтавет, ман эти тит-хүрум хөтпал хаништан колув уральтаңкв патыслүв. Акв эти лув өшнэ кол нөх-пёламтавет, тот леспромхоз лувыт өшвёсыт. Сав лув тот порсыс.

Ам ФАШт ёмашакв хаништахтасум, лөль оценкал те түштавёв, стипендия-олныл ат майлувесүв. 1955 талт та школа асластислум. Устрем павыл пүльницан рүпитаңкв тетвёсум, тот туп хүрум этпос рүпитасум, ос армиянта



## Сав нйврамың нэ

**Хурит маныщи нэ Надежда Калистратовна Филиппова пöслым öлы. Хальүс район Сүкырья павылн ялмум порат ам школан щалтсасум, тав ётэ хонтхатыгласум. Надежда Калистратовна тэнут пайтым тот сав тал рүпиты. Мён потрамасмён, нан ань тав потре ловиньтэлйн.**



вуйвёсум. Юв ёхтысум, Хальүс район пүльница кұщай анумен лавыс, Тугияны павылт акв тал сыс хұрум хөтпа пöхан тётвёсыт, пуссын вина аюңкв тўлтхатасыт. Ам тув вос минёгум.

Ам акв талтем тот рүпитасум, номсахтўңкв патсум, ты павылт ёлалъ те хультёгум, öс аквтох вина айнэ хөтпаг ёмтёгум. Мөт мән вöвхатуңкв патсум. Вöсыңтур павылн тётвёсум, тот хұрум тал рүпитасум.

1959 талт нэ тотсум, ёквам Нина Фёдоровна. Тав щане щирыл Ользинаг öлы, тән Ас махум. Таве Тугияны павылнлы ёт вöвыслум. Төнт тав школа ущ астыс. Мён аквёт сав тал öлымён. Хұрум нйврам öныщимён, Валентина яныг агимён Хальүс пүльницат рүпиты, котиль агимён Татьяна Хулюмсунт павылт öлы, школат рүпиты, пыгмён Алексей Тюмень үст полицият майор нам öныщи.

Ам пүльницат нйврам самын патнэ мат рүпитасум. Титыт агим самын патнэ порат сака тәрвитың öлыс, мән лёккар нэв хот-рохтыс, юв ояс. Ёквам ёт амти хультсум, агимён самын патыс, ат лыты.

Ам ты рүпата вәглум, агим пәпёт тит-хұрум щёс юныгтаслум, тав та лёныщалтахтас. Ёквам ос ам нупылум рөңхи, нйврам ман-рыг рәтылум. Ам ювле

ләвёгум, ам тавён ат те нётнувум, агимён ань ат öлнүв. Районув яны-тыл ам сав нйврамн самын патуңкв нётсум, тананыл пуссын номиянум, вәганум. Хөт ос хунь самын патсыт, номёгум.

Акв хотты талт ам Тюмень үсн ялсум, тот Алексей Васильевич Голошубин ёт хонтхатыгласум. Тав анумен потыртас, репрессия талыт порат таве винэ магсыл Саранпавылн Хальүс-ныл НКВД махум ёхта-ласыт. Ам атам таве виңкв ат тартыстэ, Качанов öйка тав пент-сылэ пуввес, хотталъ тотвес. Тамле ты пилыщмаң порат тән öлсыт.

Пенсият öлнэм сыс ловиньтан нёпакыт хансуңкв патсум. Öвыл нёпакум «История здравоохранения Березовского района» хосат тартвес, төнт район-ный пүльницав 165 талэ төвлыс. Титыт нёпакум «Березовской больнице 200 лет» намаим öлы. Пүльницат рүпитам касың хөтпа наме тот хансым öлы, пёс хурит тув пöслувёсыт. Ты нёпакыг пұмыщ ловиньтанкве.

Мән Хальүс районувт Андрей Алексеевич сав хөтпан вәве, тав ань ватахтем тал пенсият öлы. Пустәгыл ёлалъ вос öлы, ляпа рүтанән акваг вос уральтаве, Төрүмн вос үргалаве.

**Валентина  
ХОЗУМОВА**

– Тыт ам школа ўнтыт пәсыл рүпитёгум, садикын ос школан ялантан нйврамыт магыс тэнут пайтёгум. Ат нйврам öныщёгум. Яныг пыгум ват нупыл китыт талэ төвлыс, наме Андрей. Ханты-Мансийск үст училища астыс, ань Хальүст рүпиты. Хұрманум школат ханишта-тёгыт – Яна агим он-толов классыт, Федя пыгум хөтыт классыт ос Максимум нилыт классыт. Щар мән пыгум Антошам нила талэ, садикын яланты. Öйкам öс ты школат кұр палтыглым рүпиты. Ам щёмьям ёт Сүкырья павылт öлэгум, öйка-мёнтыл кол ўнттыса-мён.

**– Нан хөт яныгмасын?**

– Саранпавылт яныгмасум. Атам Калистрат Петрович Хозумов, Хөрыңпавыл хум. Öлме палыт совхозт рүпитас. Омам Нина Афанасьевна, аги öпарич наме Качанова, Хәңла павылт самын патыс. Мән хөт нйврам öлсүв. Яныг кәңкум Петр атимыг емтыс. Альбина ув-щим Украина хөн мат öлы, Лена увщим Ясунт павылт öлы.

Надежда там-ле кәркам, потрың мәнщи нэкве. Ты ятил хөтпав щёмьятэ ёт пустәгыл вос öлы, Наянылн-Öтыранылн вос үргалавет!

**Светлана  
РОМБАНДЕЕВА**

# Кит районыгныл кётым ляххалыг

**Хонтаң район** кұшай хум Алексей Поздеев Супра мән павыл уральтаңке ялыс ос тот олнэ махум тэланьл тара-паттыс. Ань ты павылкет туп лов арыгкем хөтпа олы ос тән Мулымъя мир-колн ловиньтавет.

Алексей Николаевич Пехтышев экваг-ойкаг ёт тот хөнтхатыглас. Тән потыртасыг, павылт махум вит амартан вонханыл ёмшакв щёпитаңке эри. Ос үсхуланыл хосыт найпос тотнэ аңквалыт вәрнует ке, щар ёмас олнув.

Тувьл Супра ос Шаим павлыгт төва колыт, ма лөмтыт эрнэ нэпакын ат хасвёсыт. Таимәгыс пёс колыт ёмшакв щёпитаңке

ат вёрмавет, махум олныл ат нётавет. Лёккарыт тән палтаныл щар ат ёхталэгыт. Ань махум нэпакыт танки вәрмалыныл урыл хассыт, нётмил вөвсыт ос хотты накт лёккарыл вос кётыглавет.

Пуссын ты вәрмалит Алексей Поздеев акваг уральтаңке патыанэ.

**Хальүс район**т олнэ махум «Спасти и сохранить» нампa экологический акцият савсыр тэлат вәруңке лавхатсыт. Тән танки павланыл ос үсыт порс акван-атнэ хөталыт вәрёгыт тах. Вөр ляпа мананыл ос я ватаныл ос систам-тыяныл. Тамле тэлат рүпитан

предприятият пуссын вәруңке патэгыт. Тувьл кәсащан кәсың хөтпа ййвыт үнттуңке вөрми. Район янытыл павлыт «Чистый посёлок» касыл тах кәсэгыт. Нөх-патум павлыт олн-нётмилыл мүйлуптавет.

Няврамыт мәгыс сыресыр касылыт ос суссылтапыт вәравет. Агиришит-пыгришит «Красная книга» глазами детей» нампa касыл катыл пөслум хурияныл вос кётыяныл. Мөтаньт «Югра таёжная» касылн фотоаппаратыл пөслым хурит вос мыгыт.

**Ты ляххалыг мәнщи ләтңыг**  
**Тамара МЕРОВАН**  
**толмацлавесыг.**

## Сылы үрнэ хум



**Ханты-Мансийск үст үринэква** Ханытлан хөталт Иртыш я тармыл ёсал кәснэ вәрмал вәрыглавес. Сургутский район Русскинская павылныл ханты махум ёхталасыт - экват, ойкат, мәнлат аги-пыгыт.

Пуссын танти маснуктанылт масхатым олсыт. Ёрнкол түщталасыт, та пөхат лөляхөлсыт, ёңхатахтыгласыт. Рушитн ос мөт хонмирн маттем та пүмшалавёсыт, тән ётаньл пөслахтасыт. Ам акв хум ёт потрамасум, наме Дмитрий Васильевич Тэвлин. Ань мөн потрумён элал ловиньтэлын.

– *Дмитрий Васильевич, Ханты-Мансийск үст мүйлуңке наңын мұсты?*

– Тыт атхунь ёмас, нётнэ макве, махум мән нуплув сымыңыщ сунсэгыт, маснуктанув тай акваг та пүмшалавет. Тыг мән «Лукойл» нефтяная компания палыл автобусыл тотвесүв, ват нупыл ат хөтпа ёхтысүв. Ёсал мән онтолов хөтпа кассүв.

– *Наң хөт самын патсын?*

– Ам Ямал мат самын патсум. Щәнягум-ащәгум хосат атимыг ёмтсыг, китхуйплов талум порат савалыг хульсум. Кит қаңк ос увщи оныщёгум, тән ётаньл яныгмасум. Рүт

тай сав оныщёв. Мән ань щёмьянув ёт пуссын вөрт олэв. Эквам наме Наталя, тав өсханты нэ, мөн хұрум няврам оныщимён. Кәсың хұрум этпос нефтяныкытын олн-лөмтыл ойтыглавёв, сака сав ати, нянь винэ төмыл майлавёв. Кәсың нила тал сыс акв щёс «Буран» нампa түйттармыляласан машинал майлавёв.

– *«Ханты ясаң» нампa газета ловиньтэгын?*

– Ловиньтэлэв, төва ләтңыт ат торгамтыянув, тот мощ мөт диалектыл хансым олы. Мән манти халувт тай манти ләтнұвтыл потыртэв, нявраманув ос сака ёмшакв потыртэгыт. Яныг няврамагмён Русскинская павылт интернатт олэг, школат ханищтахтэг. Тот тай пуссын акваг руц ләтңыл потыртэгыт. Ос хунь юв ёхтэг, туп ханты ләтңыл потыртэг.

Ты ятил ханты махум пустагыл вос олэгыт, Няянылн-Отыранылн вос үргалавет!

**Светлана**  
**ХОЗУМОВА**

МĀ-ВИТ ЎРГАЛАН ВĀРМАЛЪ

# Ўс пōхат мāнь ўльпат ўнттувёсыт

**В**ōр ўргалан мāхум кāсың тāl яңк нāтнэ этпос 17 хōталэт ййвыт ўнттэгыт ос ты эрнэ тēла вāруңкве мāхум вōвыглэгыт. Тамле рўпата таи мāгсыл вāрыглаве, мāхум вōр вос ўргалэгыт, мā-вит урыл ул вос ёрувлэгыт. Руц лātңыл ты хōтал «Всемирный день древонасаждения» намаим олы.

Тамле тēла округ яны-тыл кāсың тāl вāрыглаве. Ты тāl та хōталт кит сōтыра 500 арыгкем элумхōлас 33 сōтыра арыгкем сāvсыр ййвыт ўнттысыт.

Ханты-Мансийск ўст ты акция нилыт тāl олыс. Ўс мāхум пуссын Байбалак я ляпат оlnэ ўщлахтан мāн вōвиньтāлвёсыт. Ты тāl тув 300 элумхōлас ўльпа ййвыт ўнттуңкве ёхталасыт.

Атхатам мāхум нупыл овлёт Мария Кузьминична Волдина, хан-

ты ёква, потыртас. Тав лāвыс, сossaң мāхум пёс тāгыл вōр ўргалэгыт. Вōр урыл тāн сāvсыр мōйтыт, потрыт ос āмщит оныщегыт. Потыртаме юи-пāлт тав «Ёшак най» нампа ансамбле ёт эргыс ос ййквыс. «Лылың сōюм» нампа студиян ялантан нйврамыт мāхум элыпāлт мāньщи, ханты ййквыт ййквысыт.

Ййвыт ўнттуңкве кўщайт ос ёхталасыт. Мāхум нупыл Пётр Захаров, Ханты-Мансийский район миркол



кўщай хум, потыртас. Тав лāвыс: «Мāн вōр ўнттым яныг тēла вāр-рєв, мā-вит ўргалєв. Тамле хōталыт нāн тыг матъёмас ёхтысын, мāн пуссын аквъёт сāv ййвыт тах ўнттєв».

Ўльпа ўнттын хōтал нāй хāрыгтан машинат тот суссылтавёсыт, нйврамыт ты утыл сака пўмщалахтасыт. Тамле суссылтапостаи мāгсыл вāрыглаве, мāхум вōрн ялантым аращємашакв лап вос хāрыгтэгыт ос вōрт порс мōри ул вос пāхвтэгыт. Яңк нāтнэ этпост Сургутский ос Советский районыгт вōр нōх-пєламлāлыс, ань лап-харыгтавєс.

Вōр ўргалан хōтпат ййвыт ўнттуңкве хосат тагыл щєпитахтасыт. Байбалак я ляпат мā хилсыт ос кит хўрум тāl

яныт хўрумсāt ўльпат ос мōт ййвыт тув тот-сыт. МЧСыт, ЮТЭКыт, студентыт, вōр ўргалан мāхум, ляххал тотнэ хōтпат пуссын аквъёт тот ййвыт ўнттысыт. Това мāхум щємьяң тāгыл тув ёхталасыт. Мāн мāньщи ос ханты редакциявт рўпитан мāхум ос тув ялсўв, ўльпат ўнттысўв.

Округ 22 районитт ос ўсытт мāхум ййвыт ўнттысыт. Тамле рўпата природный ресурс департамент вāрыглы ос мāхум тув вōвыглы. Тот рўпитан мāхум лāвнэныл щирыл ты ўнттум ййвыт нас тох ат осувлавет аква ўральтавет. 10-15 тāl сыс ты ўльпат яныг ййвыл ёмтэгыт.

**Людмила ТАСМАНОВА**

# Хальүс музей ты тал 35 талэ төвлү

**Я**ңк нәтнэ этпос 18 хөталэт музей янытлан хөталыг ылыс. Ты кастыл мән Хальүс районт өлнэ музей урыл потыр хансэв. Күцаиг тот Людмила Васильевна Андрианова рүпити ловиньтан.

Тав лавыс: «Ты тал музей-колув 35 талэ төвлү. Савсыр музейт рүпитан махум, учёный-хөтпат конференциян таквсы порат тыг вөвиньталыянүв. Ос музей рүпататэ урыл нэпак тах щёпитэв. Ты пора сыс музейт 20 сөтыра савсыр пормасыт, хурит, нэпакыг акван-атсүв. Ты элыпалт музейов 19 нөт порат үнттум колт ылыс. Ты яныг йильпи колн мән 2003 талт вантлысүв. Колув кос яныг, тувыл савсыр йильпи суссылтапыт вәрыгланкве колнакыт ат ыныщев. Хальүст өлнэ катыл пөслын хөтпат эт акваг рүпитэв, тән пөслум хурияныл мирн суссылтанкве ыстаңхев. Колув пөхат Добровольский кұпса ыйка үнттум колэ ёмашакв ань щёпитаве. Ты кол музейн майвес, тот мән катыл пөслум хурит суссылтанкве тах патэв.

Музейт шар яныг

колнакт газ хөнтум махум урыл выставка суссылтэв. Мөт колнакыт ос сосаң махум пормасаныл кәсалаңкве рөви. Мән хунь ты суссылтап вәрыслүв, Хальүст өлнэ мәнщит, хантыт эт потыртасүв, китыгласанүв. Тән лавсыт, сосаң махум ялпың пормасыт нупыл нэ хөтпан сунсуңкве шар ат рөви. Тыи магсыл ты пормасыт акв мән колнакн атсанүв ос яныг торыл лаптагатасанүв. Махум суссылтап сунсуңкве ке кәсашевыт, тув шалтсэгыт. Ты ялпың пормасыт Новосибирск үс институт этнография ширыл рүпитан махум манава кетыс. Ты элыпалт Новосибирск үсныл Хальүс районул мәнщит мир олупса ханищтанкве сав учёный хөтпат ёхталасыт. Тән ты маныл сав мәнщит ялпың пормасыт Новосибирск



үсн тотсыт. 18-19 нөт порат юнтым мәнщит ялпың пормасыт, ань мән музейовт кәсалаңкве рөви.

Музейт Митрофан Тебетев пөслум хуриянэ өлэгыт. Хальүс районт өлме порат ты хуриянэ пөслыгласанэ. Ань мөт музейт тав хуриянэ мирн суссылтанкве вөвияныл. Пётр Шешкин вәрум рүпатанэ ос тыт суссылтыянүв. Пормасанэ Ханты-Мансийскын ос мөт үсытн ос акваг тотыглавет. Пётр Шешкин мәнщит ләтңыл хансум потранэ ос тыт өлэгыт. Ань Кульпаст өлнэ мәнщит нөт тав потранэ руш ләтңын толмашлыяныл, ты юи-палт мән тананыл

акв нэпакыг вәриянүв.

Кит тал сыс «Меншиковские чтения» наппа конференциян Россия янытыл учёный махум тыг вөвиньталыянүв. Хальүс районт өлнэ няврамыт магсыл научный конференция вәрыглэв. Шар өвлэт агит-пыгыт мәнщит ос ханты пөс йис вәрмалит урыл хансым нэпакныл докладыт хассыт. Ань няврамыт павланыл өлнэ хөтпаныл мөйтыт, потрыт нэпакн хансыяныл. Төват танки пөс порат олум рүтаныл урыл нэпак хансэгыт. Тамле докладыт хунтланкве сака пұмаш.

Касың тал «Ночь музеев» наппа ялпың хөтал вәрыглэв. Яңк нәтнэ этпост кон ат турманлы, тыи магсыл мән рөтың юсвой этпос йтипалаг махум мәнки палтылув вөвыглыянүв. Ты кастыл мән савсыр йильпи выставка щёпитэв. Акв тал сыс 20 сөтыра арыгкем элумхөлас музейн ёхталы».

Хальүст өлнэ музей тамле эрнэ рүпата ты вари. Мәнщит ос ханты пөс пормасыт акван-атым, суссылтапыт вәрыглым пөс йис вәрмалит элалы тотыяныл.

Людмила АЛГАДЬЕВА



## МУЗЕЙТ ЯНЫТЛАН ХӨТАЛ

# Кāсың үст манос пāвылт музейт рӯпитәгыт

**Музейт янытлан кастыл 1977 тәлт Россия пāлыл мōт хōн мāн лāтың кēтвес. Ос 1978 тәл пāсыл тот рӯпитан мāхум ялпың хōталыл вāрвёсыт, ань 150 арыгкем сāвсыр мātт ты хотал янытлаве.**

Ам ōвыл щёс Лангепасн минамумт, ты үс ос тот ōлнэ мāхум урыл мощща вāсум. Үс хот-мус хāштāлыг ōлыс. Ту-выл аквёет рӯпитан нэмёнтыл Музейно-выставочный центрнн ялсумён. Кол кӯщаиг ōлнэ хум ёт Андрей Николаевич Дробышев ос сāвсыр суссылта-пыт щёпитан хум Александр Николаевич Седов ёт тот ты вайхатсумён. Тән пуссын суссылта-пыт мēнамён сус-сылтасанён ос кāсың тēла урыл янас по-тыртасыг. Та юи-пāлт мēн үс вāрмалит ос үст ōлнэ тōва хōтпат вāрум ёмас тēланыл мāгыс вāңкве патсанмён.

Ань мā янытыл ōлнэ мāхум аквтох музейн щалтнёныл порат хурит, пормасыт суснёныл сыс матыр хаништәгыт. Сāвсыр мирныт олуп-саныл, маснутаныл ос пёс тāгыл ōщнэ нака-ныл тāра-паттыяныл. Няврамыт музейнялан-тым ос номтыңнувёт ёмтәгыт, мōт хōтпа ну-пыл сымыңыщ сунсым ōлэгыт. Музейт рӯпи-тан хōтпат тамле ёмас тēлат акваг ты вāрэгыт. Тувыл мāхум тāнки ос пӯмщалахтәгыт, таимагыс мōлал тāн лоичит музей-колыл үнттувёсыт.

Андрей Дробышев лāвыс, ювле хультум хӯрум тәл порат тāн үсанылт сāвсыр мāнь музейт, искусство цен-

трыт акван-тотвёсыт ос акв йильпи яныг ко-лыл майвёсыт. Тāн ань пуссын акв колт рӯпи-тәгыт.

Мēн музейт сāв пӯмыш кāсаласмён. Тōва суссылтапыт ак-ваг рӯпитәгыт, мō-таныт мōрсың по-рат щёпитāлыглавет, тōвнакт пормасыт сус-сылтаңкве мōт мāныл тув тотыглавет.

Тувыл тот акваг сус-сылтан пормасыт, ху-рит ōс пентуңкве вёр-мавет. «История го-рода» нампa колнакт Лангепас үс ōвылтыт потыртәгыт. Ты үс 25 тәлэ ущтынув тōвлыс. Ты элы-пāлт тот вōр ōлыс, мā-вōй хōнтвес ос тув аквты щёс мāхум сāв мāныл рӯпитаңкве ёхтысыт, ōвлёт тāн ба-локытт ōлсыт, тувыл ййв колыт үнттувёсыт. Ань тав үсыг ёмтыс, кирпичиң сāв яныг кол үнттувес. Тот атпан нупыл хӯрум сōтыра сāвит элумхōлас ōлы. Хосат тāгыл үст ōл-мыгтам хōтпат тōвнакт няв-рамыт элы-пāлт мовиньтәгыт, лāвёгыт, тāн ōлнэ коланыл пōхат мāхум пил вātсыт ос вōраясыт.

Мā-вōй нōх-винэ вāрмалы ōвылтыт ōс янас колнак щёпитавес. Тот нефтяникыт пор-масаныл ос сāвсыр техникат суссылтавет. Соссаң мāхум ос «При-рода Югры» нампa кол-нак акв ляпан вāрвёсыг.



Та ёрт ōлнэ хантыт ōлупсаныл мӯсхалыгха-нищтымат ос потраныл музейт акван-атымат.

Мāнавн тот таи мӯстыс, сāвсыр ōлыг-лам накыт мāкыг щё-питавёсыт, пормасыт эрнэ мāн пинвёсыт, ос соссаң мāхум ōлупсаныл урыл потыртым нэматыр ат тэлыгтәгыт. Тāн та ёрт ōлнэ хантыт коны-пал мōт мāt ōлнэ хан-тыт ос мāнышит пёс йис наكانыл, коланыл мощ мōт щирыл ке ōлэгыт, ōс вāганыл ос мāхумн хултыяныл.

Мōт колнакт мā ёлы-пāлт хōнтым сака пёс пормасыт суссылта-вет. Андрей Николае-вич мāхманэ ёт ты утыт Сургут үс ляпат

хōнтсаныл ос тувыл нōх-хилсаныл. Тāн пу-сын ищхипың ут хосыт суссылтавет.

Пуссын ты выстав-кат музейт акваг рӯпитәгыт, тāн хот ат вивет. Ос маныр мāгыс, маныр иң пӯмщалаңкве үст ōлнэ мāхум тув щалтсэгыт, манхурип касылыт, эргын-ййквнэ накыт тот вāрыглавет, хумус мāхум ущлах-тәгыт, ты урыл ам мōт потыр тах хансэгум.

Ань музейт рӯпитан хōтпат мāн ялпың хōталыл янытлыянӯв, ос сāвсыр мӯтраң вāр-малитын муй мāх-маныл вос ханищтыя-ныл, пӯмщалаыяныл.

Тамара МЕРОВА

## МҮЙЛЫН ХӨТАЛЫТ

## Восыңтүрныл тётым потыр

**Х**альүс рай-  
он Восыңтур  
павылт өлнэ нэ Мар-  
гарита Витальевна  
Ковалюк (Шестало-  
ва) мән редакциявн  
пищма тётыс. Тав  
мирколт рүпиты, ань  
тав павлың махманэ  
урыл хансыс, ялпың  
хөталыт порат ху-  
мус тән мүйлысыт.  
«Үринэква хөтал»  
тән хумус янытла-  
саныл, ты урыл тав  
хансум пищматэ  
ловиньтэлын.

Касың тўя соссаң  
махманув үринэква  
ёхтын кастыл щё-  
питахтэгыт, ялпың хө-  
тал вәрэгыт. Ты тал юв-  
ле хультум этпос нилыт  
хөталэт мән культура  
колувт рүпитан хөтпат  
павлың махманув ак-  
ван-атыгласаныл. Та  
хөтал кон мощ ащир-  
маң олыс. Ос няврамыт,  
яныгхөтпат пуссын тув



ёхталасыт.

Няврамыт ос хум  
хөтпат магыс савсыр  
касылыт щёпитал-  
вёсыт, тән сәграп  
пахвтысыт, сун ұлтта  
поргысыт, йив ләкква-  
хартсыт. Людмила Са-

вельевна Хозумова  
агиришит ёт маньши  
ййквыт ййквыс. Тав  
Лөпмус павылныл олы,  
маньши ләтңыл по-  
тырты. Ань няврамыт  
ёт рүпиты, тананыл сак  
хартуңкв, ййквуңкв ха-  
нищтыанэ. Клуб колт  
рүпитанэтэ магсыл ань  
олныл ат ойтаве, мо-  
щёрт эрың тав ойтуңкв  
патаве.

Ирина Никифо-  
ровна Муравьёва (аги  
опарищ наме Гришки-  
на) «Үринэква хөтал»  
урыл мирн потыртас,  
соссаң махум хумус  
пұрлахтэгыт. Тав ома-  
тэ Мария Тимофеев-  
на Октябрьский район-  
ныл олыс, аще Никифор  
Петрович Сюмин хо-  
тыл Ас я ёрныл олыс.  
Такви Ирина Тобольск

ўст ханищтахтас, ань  
няврамыт рущ ййквытн  
ханищтыанэ.

Анна Дементьевна  
Канева (такви опарищ  
наме Шесталова) ос  
маньши яныгпала хөт-  
па. Ялпың хөтал олум  
порат тав нэ хөтпат  
ос няврамыт ёт арсын  
йивн нэгсалас.

Пұрлахтаманыл юи-  
палт мүйлын махум  
пуссын хұл исмитыл  
айтвёсыт, соламатыл  
тыттвёсыт. Хұлың  
нянь ёт исум щай ай-  
сыт. Тохты мән ёмашакв  
мүйлысүв.

**Маргарита Ковалюк**  
**хансум потре маньши**  
**ләтңыл Валентина**  
**ВАСИЛЬЕВА хансытэ**  
**Хурит павлың махум**  
**ос няврамыт пөслым**  
**өлэгыт.**



**Луима сэрипос**  
**(Северная заря)**  
№10 (1076), 23.05.2014  
Соучредители  
Дума, Правительство  
Ханты-Мансийского  
автономного округа – Югры  
**Издатель**  
Департамент общественных  
и внешних связей Ханты-  
Мансийского автономного  
округа – Югры

**Редакция**  
Главный редактор –  
**Решетникова Р.Г.**  
Телефон (3467)33-36-82  
И.о. заместителя главного  
редактора – **Узель В.В.**  
Телефон (3467)33-22-72  
Старший корреспондент  
**Ромбандеева С.М.**  
Телефон (3467)33-23-09

**Адрес редакции и издателя:**  
628011, г.Ханты-Мансийск,  
ул.Комсомольская, 31  
тел./факс (3467)33-17-52  
**E-mail:** luima@ugracom.ru  
Газета размещена на сайте  
**www.khanty-yasanq.ru**  
**Отпечатано:**  
ОАО «Издательский дом  
«Новости Югры» г. Ханты-  
Мансийск», ул. Мира, 46.

**Подписано в печать:**  
по графику 21.05.2014 г.  
в 15.00.; фактически  
21.05.2014 г. в 15.00.  
Индексы **04399, 54399**  
Тираж **1750 экз.**  
Заказ **1394**  
Цена свободная  
Мнение авторов  
публикаций не  
обязательно отражает  
точку зрения редакции.

Газета зарегистрирована  
Управлением Федеральной  
службы по надзору в сфере  
связи, информационных  
технологий и массовых  
коммуникаций по Тюменской  
области, ХМАО-Югре и  
ЯНАО.

Свидетельство о регистрации  
ПИ №ТУ  
72-00795 от 23 января 2013г.